


TEZAU LITURGIC

18 AUGUST

ACATISTUL SF. CUVIOS IOAN DE LA RILA III



MOSCOVA, 2000



Акафист преподобному и богоносному отцу нашему Иоанну, пустыннику Рыльскому, чудотворцу

Кондак 1

Избранный чудотворче и предивный угодниче Христов, преподобне отче наш Иоанне, от юности к Богу прилепився и мирский мятеж оставль, в гору Рыльскую вселился еси, идже постом, молитвою и плачем многим подвизався и волнение суеты преплыв, небеснаго Царствия сподобился еси. Сего ради воспеваем тя, яко тепла о нас к Богу молитвенника, и молим ти ся, благодати тезоименне, даждь нам благодать, во еже звати ти:

Радуйся, преподобне отче Иоанне, Болгарския земли солнце пресветлое.

Икос 1

Ангели удивишася богоугодному житию твоему, преподобне отче Иоанне, и яко служебнии дуси, в служение к тебе посылаеми, хотящему наследовати спасение, радостными гласы привещаху тебе таковая:

Радуйся, Спасителя твоего заповеди соблюдый;

радуйся, ничтоже на земли паче Его
возлюбивый.
Радуйся, яко Божественнаго гласа, во след
Христа зовуща, послушал еси;
радуйся, яко землю обетования достигл еси.
Радуйся, на горе Рыльстей мирскаго потопления
избывый;
радуйся, в благодарственную жертву самого
себе Богу принесый.
Радуйся, на лествицу добродетелей возшедый;
радуйся, Бога на версе ея узревый.
Радуйся, не в гадании Христа видевый;
радуйся, Агнцу за ны от века закланному
послуживый.
Радуйся, древа жизни сопричастниче;
радуйся, Царствия небеснаго наследниче.
Радуйся, преподобне отче Иоанне, Болгарския
земли солнце пресветлое.

Кондак 2

Видя жития сего всяческую суету, преподобне
отче Иоанне, вся имения твоя нищим раздал еси
и узким путем иночества во след Христа
шествуя, широту небеснаго Царствия достигл
еси, непрестанно поя Богу: Аллилуия.

Икос 2

Разум недоразуменный, в Небеснем Иерусалиме
сокровенный, постигнути желая, преподобне

отче Иоанне, во вся оружия Божия одлекся еси
и умных рук на высоту воздвизанием мысленного
Амалика побеждал еси. Мы же, победителя твоего
зряще, в похвалу взываем тебе таковая:

Радуйся, ангелов подражателю;

радуйся, праотцем святым подражателю.

Радуйся, новый Ное, покаяния проповедниче;

радуйся, древняго Авраама веры наследниче.

Радуйся, Исаакова послушания соприспослужниче;

радуйся, Иаковля богозрения сообщниче.

Радуйся, над страстями и похотьми, яко Иосиф
над Египтом, воцаривыйся;

радуйся, Моисейски, постом и молитвою к Богу
собеседник явивыйся.

Радуйся, Самуилова богозвания услышавый;

радуйся, Давидову кротость восприимый.

Радуйся, Илиину ревность по Господе Боже
наследовавый;

радуйся, Иовле терпение в злостраданиих
стяжавый.

Радуйся, преподобне отче Иоанне, Болгарския
земли солнце пресветлое.

Кондак 3

Сила Вышняго подвижаше тебя, преподобне отче
Иоанне, на большия подвиги и душа твоя, якоже
елень на источники водныя, возжада к Богу
крепкому, живому. Сего ради из обители изшед,
идже образ ангельский восприял еси, в гору

Рыльскую вселился еси, Богу присно воспевая:
Аллилуия.

Икос 3

Имея в пустынном житии твоём, преподобне
отче Иоанне, едину одежду кожаную во одеяние,
в пищу же былие травное, еже слезами горькими
вкушая, с пророком Богу вопиял еси, — скотен
бых у Тебе, — нас воставляеши вопити тебе:
Радуйся, в пустынном житии Предтечи Иоанну
подражавый;
радуйся, житием сим небесныя дары стяжавый.
Радуйся, благое иго Христово на себе вземый;
радуйся, легкое бремя Его на раме понесый.
Радуйся, кротости Владыки твоего научивыйся;
радуйся, в смирении Его упокоивыйся.
Радуйся, яко на тебе исполнися благоволение
небеснаго Отца;
радуйся, яко в тя вселися благодать Пресвятаго
Духа.
Радуйся, яко тебе открываша безвестная и
тайная;
радуйся, яко тебе воздадеся радость спасения.
Радуйся, яко за скорбное житие сподоби тя Бог
вечнаго веселия;
радуйся, яко срадуются сему твои кости
смиранныя.
Радуйся, преподобне отче Иоанне, Болгарския
земли солнце пресветлое.

Кондак 4

Бурю многую искушений воздвиже диавол,
устрашити и отгнати хотя преподобнаго Иоанна
от места спасения. Но доблий непобдимъ
пребываше, непрестанно к Богу взывая:
Господи, посли свет Твой и истину Твою, да
наставита мя в гору святую Твою и селения
Твоя, идже со всеми святыми воспою: Аллилуия.

Икос 4

Слышаша пастырие тя с безсловесными овцами
бесдующа, преподобне отче Иоанне, со тщанием
притекоша к тебе, яко к пастырю словесных
овец, и удивльшеся житию твоему, воспеваху в
похвалу твою таковая:

Радуйся, нищих духом ко Христу водителю;
радуйся, пути в Царство небесное указателю.
Радуйся, плачущих о Господе утешителю;
радуйся, кротких земли сообладателю.
Радуйся, алчущих Царства небеснаго
насытителю;
радуйся, жаждущих правды Божия напоителю.
Радуйся, милостивым мзды Божия
щедроподателю;
радуйся, чистотою сердца изрядный
богозрителю.
Радуйся, миротворцев богосыновный
наставниче;
радуйся, изгнанных правды ради верный

спутниче.

Радуйся, за Христа от злых человек поношение претерпвый;

радуйся, трудов твоих многую мзду на небесх восприемый.

Радуйся, преподобне отче Иоанне, Болгарския земли солнце пресветлое.

Кондак 5

Боготечней звезде уподобився, преподобне отче Иоанне, по неколиких летех подвига твоего от колибы хврастныя и дупла древяна в пещеру темну востекл еси, и на камени нозе твои поставив, Камени Краеугольному, Христу, непрестанно пел еси: Аллилуия.

Икос 5

Видев южик твой, Лука отрок, оставльша ты мир и в пустыню всельшася, взыска ты яко сокровище некое, преподобне отче Иоанне, и благословения сподобився пребывати в подвизах твоих, возрадовася зело и пояше в похвалу твою таковая:

Радуйся, Началопастыря Христа учениче;

радуйся, добродетелей Его подвижниче.

Радуйся, древо, при исходищих вод насажденное;

радуйся, плоды Святаго Духа приносящее.

Радуйся, Божественныя любви наставниче;

радуйся, радости о Дусе Святе вместилище.
Радуйся, мира премирнаго селение;
радуйся, адаманте изрядный долготерпния.
Радуйся, благости и милосердия пучино
безмерная;
радуйся, веры правило несумненные.
Радуйся, кротости образ и начертание;
радуйся, учителю воздержания.
Радуйся, преподобне отче Иоанне, Болгарския
земли солнце пресветлое.

Кондак 6

Проповедницы миру добродетелей твоих
явишася пастырие, преподобне отче Иоанне,
иже тя видша в пустыни злаком травным
чудесно их напитава, и Питателю всех, Богу,
поюща: Аллилуия.

Икос 6

Возсиял еси в пустыни Рыльстй, яко велие
светило светом добродетелей твоих, преподобне
отче Иоанне, сего ради стекахуся к тебе
хотящии шествовати путем твоим, иже и в
похвалу твою вопияху таковая:
Радуйся, яко во вся оружия Божия облеклся еси;
радуйся, яко кознем лукаваго противустал еси.
Радуйся, яко чресла истиною препоясал еси;
радуйся, яко в Божественную правду одялся
еси.

Радуйся, яко уготовался еси к мира
благовствованию;
радуйся, яко щит имел еси, веру непобедимую.
Радуйся, яко вся стрелы лукаваго разжженныя
угасил еси;
радуйся, яко шлем спасения восприял еси.
Радуйся, глагол Божий присно во устех носивый;
радуйся, глаголом сим, якоже мечем, врага
победивый.
Радуйся, яко всегда в молитвах пребывал еси;
радуйся, яко постом душу твою питал еси.
Радуйся, преподобне отче Иоанне, Болгарския
земли солнце пресветлое.

Кондак 7

Хотящу брату твоему, врага человека
наущением, взяти сына своего от сожития
твоего, преподобне отче Иоанне, змий, навет
лукаваго обличая, усекну и умертви отрока.
Добре бо бе ему от тела разрешиться и чисту ко
Господу преити, да поет с тобою и всеми
святыми: Аллилуия.

Икос 7

Новую обитель воздвигл еси, преподобне отче
Иоанне, в нейже игумен был еси богособранному
стаду словесных овец, иже слышаху гласа твоего
и идяху добродетельным путем твоим, в похвалу
твою зовуще сицевая:

Радуйся, живой в помощи Вышняго;
радуйся, водворивыйся в крове Бога небеснаго.
Радуйся, истинный рабе Его и служителю;
радуйся, лжи нелицемерный обличителю.
Радуйся, веры правыя насадителю;
радуйся, суеверия искоренителю.
Радуйся, целомудрия наставниче;
радуйся, послушания учителю.
Радуйся, злобы диаволи разрушителю;
радуйся, мира Божественнаго сеятелю.
Радуйся, подвизающихся о Господе укрепителю;
радуйся, во грехи падающих исправителю.
Радуйся, преподобне отче Иоанне, Болгарския
земли солнце пресветлое.

Кондак 8

Странное чудо видеша христоименитии людие,
человека на многа лета беснованием
одержимаго к преподобному Иоанну
приведшии, здрава того сотвори,
благодарственно воспвающа Богу: Аллилуия.

Икос 8

Всем, приходящим к тебе, вся был еси,
преподобне отче Иоанне, сего ради славляху тя
окрестнии людие и в похвалу твою воспеваху
таковая:

Радуйся, постом и молитвою диавола
посрамивый;

радуйся, духов лукавствия от человек изгnavый.
Радуйся, себе от козней вражиих крестом
оградивый;
радуйся, людей окрестных от прелести лукаваго
молитвою избавивый.
Радуйся, соль земли, водою крещения
раждаемая;
радуйся, силою Божественною притекающих
осоляющая.
Радуйся, граде Христов, верху горы
поставленный;
радуйся, светом небесным осияваемый.
Радуйся, светильниче, в мир сем добродетельми
светящий;
радуйся, к Богу и ближним любовью горящий.
Радуйся, обуреваемых ересьми тихое
пристанище;
радуйся, Православия непоколебимый столпе.
Радуйся, преподобне отче Иоанне, Болгарския
земли солнце пресветлое.

Кондак 9

Всякое естество человеческое удивися, зря тя во
плоти, яко безплотна, живуща, преподобне отче
Иоанне. Темже благочестивый царь Петр
слышав о тебе, восхоте благословения твоего, но
не возмогоша к тебе приблизитися, видением
огня и дыма сподобил еси его, иже и
благодарственно воспе Богу: Аллилуия.

Икос 9

Ветии многоглаголивии не могут по достоянию восхвалити тя, преподобне отче Иоанне, но благочестивый царь Петр, удивився твоей святыни и отеческое твое получив наказание посланием твоим, благодарственно тебе воспеваше:

Радуйся, Царя царей служителю;
радуйся, закона Его исполнителю.
Радуйся, Христови сраспныйся;
радуйся, славы Его сподобивыйся.
Радуйся, сосуде Божественныхъ благодатей;
радуйся вместилище всех добродетелей.
Радуйся, яко тобою Бог прославляется;
радуйся, яко тобою демоны посрамляются.
Радуйся, печальных благодатное утешение;
радуйся, скорбящих нечаянное радование.
Радуйся, монашествующих покрове и
утверждение;
радуйся, всех верных упование и защищение.
Радуйся, преподобне отче Иоанне, Болгарския
земли солнце пресветлое.

Кондак 10

Спастися хотя суетныя славы человеческия,
Божественныя же сподобитися, преподобне отче
Иоанне, игумена другаго вместо себе братии
поставил еси и завет добрый им завещаал еси, и

на молитвенныя подвиги в безмолвии паки удалися еси, един Единому поя Богу: Аллилуия.

Икос 10

Стену и утверждение имуще ты вси православнии людие земли Болгарския, преподобне отче Иоанне, славляху всюду подвиги твоя, в похвалу твою вопиюще таковая: Радуйся, яко терпя, потерпел еси временныя скорби;

радуйся, яко внят и услыша Господь твоя молитвы.

Радуйся, яко возведе ты от рова страстей и греховныя тины;

радуйся, яко постави нозе твои на твердем камени.

Радуйся, яко вложи Господь во уста твоя песнь нову;

радуйся, яко ею воспевал еси Бога нашего выну.

Радуйся, яко мнози узреша чудеса твоя и убояшася;

радуйся, яко боящиеся Господа тобою спасошася и непостыдешася.

Радуйся, яко правду Господню не скрыл еси в сердца твоем;

радуйся, яко истину и спасение возвестил еси людем.

Радуйся, яко возрадовашася тобою Господа ищущии;

радуйся, яко возвеличиша Его спасение любящих.

Радуйся, преподобне отче Иоанне, Болгарския земли солнце пресветлое.

Кондак 11

Пение всякое побеждается, спростретися тщащееся ко множеству многихъ слез твоих и подвигов, преподобне отче Иоанне; старостию же преклонен и недугом отягчен, молитвенно к Богу взывал еси: Боже Вседержителю, приими мя грешнаго раба Твоего и сопричти мя лику избранных Твоих, да с ними пою Ти: Аллилуия.

Икос 11

Светоприемную твою душу мирно предал еси Господеви, Егоже от юности возлюбил еси. Богособранная же чада твоя, безгласна тя зряще, со слезами вопияху:

Радуйся, светило Православия, в пустыни Рыльстей возсиявшее;

радуйся, к небесному Свету, Христу Богу, прешедшее.

Радуйся, наставниче наш, иже к совершенству нас призываеши;

радуйся, пастырю добрый, иже к блаженному концу нас путеводиши.

Радуйся, яко и по преставлении жив от веры пребываеши;

радуйся, по исходе твоём духом нас не оставляеши.

Радуйся, новый наш пред Богом предстателю; радуйся, о душах наших теплейший ходатаю.

Радуйся, святе, ликом ангельским сопричтенный;

радуйся, блаженне, в покой небесный достигнувый.

Радуйся, рабе благий, в радость Господа твоего вшедый;

радуйся, трудов твоих достойную мзду восприемый.

Радуйся, преподобне отче Иоанне, Болгарския земли солнце пресветлое.

Кондак 12

Благодать дана ти бысть от Бога чудеса творити дивная и по преставлении твоём, преподобне отче Иоанне: Мануилу бо царю Греческому мышцу исцелил еси, Георгия Скилицу от тяжкаго недуга избавил еси, епископу Унгарскому язык молчанием связав, паки разрешил еси. Иже вси, от бед и болезней избавльшися, воспеваху Богу: Аллилуия.

Икос 12

Поюще твоя подвиги и чудеса, восхваляем тя, преподобне отче Иоанне, и чем святую память твою, вопиюще в похвалу твою таковая:

Радуйся, чудес Христовых источниче;
радуйся, умиления сердечнаго сокровище.
Радуйся, тебе бо ангели служаху;
радуйся, яко не имущу питания, хлеб тебе
приношаху.

Радуйся, Православия утверждение;
радуйся, ересей посрамление.

Радуйся, болящих исцелителю;
радуйся, скорбящих утешителю.

Радуйся, верных прославление;
радуйся, неверных обличение.

Радуйся, плачущих о гресех ходатаю к Богу
предивный;

радуйся, кающихся в беззакониих отче
чадолюбивый.

Радуйся, преподобне отче Иоанне, Болгарския
земли солнце пресветлое.

Кондак 13

О, преподобне и богоносне отче наш Иоанне,
утшение скорбящих и врачу недужных! Приими
ныне малое сие приношение наше, и будущия
муки всем нам избавитися Господа умоли, да с
тобою вопием Ему: Аллилуия.

*Сей Кондак глаголется трижды. Также Икос 1-й:
Ангели удивишася... И Кондак 1-й: Избранный
чудотворче...*



ПОЛНЬІЙ
АКАФИСТНИК
КАНОНИЧЕСКІЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ



НОВОЕ
* НЕБО